

EDITORIAL

Pairtengen dagiti dangadang laban iti parigat ken traydor a rehimen Marcos

Agtultuloy nga umun-uneg ken kumarkaro ti panagsagaba ti umili a Pilipino gapu kadagiti programa ken patakaran ti rehimen Marcos a kontra-marigrigat, kontra-umili ken pabor iti dadakkel a kapitalista a gangannet ken dagiti lokal nga ahente da, dagiti apo't daga ken burukrata kapitalista.

Agpappapas ti pamilya a Marcos, dagiti kroni ken alipures na iti pondo ken pribilehiyo ti guberno, bayat nga agsusuwek ti biag ti mayoria dagiti Pilipino. Awan pannakabannog nga agtrabtrabaho dagiti mangmanged ken masa nga anakling-et. Palalo nga agkurang ti tangdan ken sweldo iti sango ti agtultuloy a panagtayok ti presyo ken dagiti babayadan. Minilyon ti awanan trabaho. Nakabasbassit a sapul a lumablabas laeng iti dakulap ti masa nga agrigrigat. Umad-adu ti kumkumpet iti patadem tapno laeng adda ti maipakan da kadagiti annak da.

Kagurgura la unay ti umili ti rehimen Marcos iti kinaawan panangisakit daytoy iti masa nga agsagsagaba iti


kinakurapay, ken iti panangpakaro daytoy ti krisis iti pagbiagan ken panagrigrat ti umili. Agintutuleng ni Marcos iti nasaknap nga awag ti umili. Saan na nga ikaskaso ti pukkaw ti nalawa a masa para iti makabiag a tangdan ken sweldo, trabaho, pudno a reporma iti daga, karbengan iti kadanuman, panangpadakkel ti badyet para iti libre a serbisyo iti gimong ken tapno palawaen ti lokal a produksyon ken dadduma pay a nairut a kadawatan.

Ketdi, makumikom ni Marcos kadagiti pammarang a pabuya nga awan ti ituntunda na a gin-awa iti umili, kas ti dakkel a drama ti panangbalasa iti

gabinete (a taltallo laeng met ti sinukatan na), panangipasindayag iti ₱20 kada kilo a bagas (a malaksid a sumagmamano laeng ti nagnumar ket pangmabiitan laeng), libre a lugan iti LRT (nga uppat nga aldaw laeng) ken nu anya pay dita nga ubbaw a gimik. Tapno pusipusen ti ulo ti umili, agiruruar ni Marcos ken dagiti upisyal na kadagiti estadistika tapno kaluban ti agtultuloy a panagkaro ti krisis iti ekonomya, pananggato ti presyo dagiti gagatangen ken ad-adda pay a pannakatennag iti kinarigrat ti minilyon a Pilipino.

Nakapalpalalo ti panangrabngis ti rehimen Marcos iti karbengan ken pagbiagan ti masa nga anakling-et. Tapno guyugoyen dagiti kapitalista nga agpupuonan, ilanlansa ni Marcos

ti sweldo dagiti mangmanged tapno gundawayan ti nalaka a pigsa't tegged da. Iti kaaw-awayan, ar-aramaten ni Marcos ti pasista a militar tapno wayaan ti nasaknap a panagkamkam ti daga para kadagiti plantasyon ken operasyon a panagminas, a mangpadpadisi iti ginasut a ribo a mannalon ken dagiti katutubo nga umili manipud iti daga da. Maag-agawan ti pagbiagan dagiti mangngalap, dagiti drayber ti dyip ken dadduma pay a babassit nga agsapsapul. Iti nagan ti panagsali-



metmet, balak ni Marcos a kissayan ti empleyado ti gubyrno nga ad-adda a mangpadakes iti serbisyo a pangpubliko.

Parigat ngaruden iti umili, agtultuloy pay nga ikabkabil ni Marcos iti peggad ti kinatalged ti pagilyan, gapu iti bulag a panagsurot na kadagiti diktar ti amo na nga imperyalista a US. Agpapausar ni Marcos iti Indo-Pacific Strategy ti US tapno palikmutan ken lapdan ti panaggigsa ti China. Umadado nga umad-ado dagiti base militar ken pasilidad ti US iti Pilipinas tapno agistasyon ti rinibo a tropa nga Amerikano iti nadumaduma a paset ti pagilyan. Ipagpaguyod ni Marcos ti Pilipinas iti gubat a kayat ti US a pabet-taken, iti awan-ressat a panangisayangkat kadagiti panagsanay ken panagsagana iti gera, ken panagimbak ti umad-ado nga umad-ado a napipigsa nga armas a panggubat ti US nga isir-sirig na iti karibal daytoy a China.

Gapu iti panangparigat ken panangtraydor iti umili, ad-adda a maisinsina ti agar-ari a rehimen iti umili a Pilipino. Iwaswasiwas ni Marcos ti Memorandum Circular No. 83 tapno sirurungsot nga imula ti pasista a terror tapno pawilan ti panaglaban ti umili. Ngem saan a malapdan ni Marcos ti panagabante ti militante a tignay masa gapu ta adda iti likod

daytoy ti kaadwan nga umili a determinado a gibusan ti panagbisin ken pannakaikuspil.

Konkonsolidaen ni Marcos ti poder na iti panangdutok ti nasurok 200 heneral iti AFP ken dagiti baro a tauhan kadagiti kumpanya nga iggem ti gubyrno, bayat a wagwagwagen daytoy ti krisis iti pulitika iti sango ti agtultuloy ken kumarkaro a binnusor dagiti agriribal a bunggoy.

Iti gagem nga agtalinaed iti poder ti pamilya da, panggep ni Marcos a parmekenen dagiti Duterte tapno lapdan ti plano ti karibal na a makasubli iti poder inton 2028. Ngem arig na pagay-ayaman na ti umili iti panangitantan dagiti alipures na iti Senado iti panaglitis iti *impeachment* kontra ken Vice President Sara Duterte, pakakitaan ti panag-iinnareglo dagiti bulok a reaksyunaryo a bunggoy. Napaspas nga agramramaram ti apoy ti pungtot ti umili kadagiti gandat a lapdan ti panaglitis ken panangpasungbat ken Sara Duterte iti pananggastar ti kwarta ti umili ken dadduma pay a nadadagsen a basol iti umili.

Awan ti itunda a gin-awa ti bukrurata kapitalista, pasista ken asoaso a rehimen Marcos iti biag ti umili a Pilipino. Iti tengnga ti tumadtadem a krisis, awan ti pagpilyan ti masa

nga agrigrigat ken maidadanes nu saan a makidangadang. Idurduron ti sitwasyon dagiti mangmangged, mannalon, malaproletaryado ken dadduma pay a maidadanes a dasig ken sektor nga agkaykaysa tapno ilaban ti pagbiagan ken dagiti demokratiko a karbengan da, ken iturong ti pungtot ken protesta da iti rehimen Marcos, iti imperyalismo a US ken dagiti pasista a gamat daytoy.

Kadagiti pabrika, komunidad, iti nadumaduma nga ili ken prubinsya, tuduen dagiti madagdagus a parikut ken panawagan ti masa. Iti basaran, buklen ti solido a pigsa ti masa iti langa dagiti unyon ken dagiti timpuyog ken ingato ti kamulatan da. Agmartsa wenno agrali tapno ipakita ti nasaknap a panagkaykaysa da ken paawengen ti pukkaw da. Papigsaen wenno itakder dagiti sangay ti Partido ken dagiti limed a rebolusyonaryo nga organisasyon ti masa tapno agserbi a landok a bugas ti nalawa a masa. Tarabayan isuda iti dangadang da ken ingato dagitoy iti panaglaban iti agar-ari a rehimen Marcos.

Rumbeng nga agpursigi iti panangpapigsa ken panangpalawa iti New People's Army kas armas ti umili tapno naan-anay a gibusan ti sistema a mangidaddadanes ken manggun-gundaway kadakuada. Rekruten ti kaadwan a mangmangged, mannalon, mala-proletaryado, mangngalap, dagiti petiburges nga intelektwal tapno agserbi a Nalabbaga a mannakigubat ken kumander ti New People's Army.

Iti sango ti todo a kinaranggas ken brutalidad ti agar-ari a rehimen, natibker ti takder ti NPA nga ilaban ti pagimbagan ken karbengan ti masa, ken dagiti nainkalintegangan ken pangmabayagan a tarigagay ken interes da. Saan a maal-allilaw ni Marcos dagiti rebolusyonaryo a pwersa uray pay agisuot ti maskara a "kapy" tapno ilemmeng ti pasista a pangil na. Nairut a pangiggeman dagiti Nalabbaga a mannakigubat dagiti armas da. Nakasagana da a lumaban para iti umili agingga iti maudi a tedted ti dara da. Determinado da nga iyabante ti gubat ti umili agingga't balligi.

 Tawen LVI No. 11 Hunyo 7, 2025 Ti Ang Bayan ket maipabpablaak iti lenggwahe a Pilipino, Bisaya, Iloko, Hiligaynon, Waray ken Ingles. Agawawat ti Ang Bayan kadagiti kontribusyon nga artikulo ken damdamag. Maallukoy met dagiti agbasbasa nga agidanun kadagiti dillaw ken rekomendasyon para iti panagdur-as ti pagiwamak tayo.	Nilalaman Editorial: Papigsaen dagiti dangadang laban iti parigat ken traydor a rehimen Marcos 1 Ika-4 a teoretikal a kumperensya ti NDFP 3 Laban ti mangmangged, drayber ken nakurapay 4 Panangriribuk ti militar kadagiti komunidad 5 OP-OD, naiyaramid 5 Panangkamat ti rehimen a Trump kadagiti imigrante 6 Dagiti protesta 6 Iti ababa a sarita 7 Pribatisasyon ti CBK Hydroelectric Plant 8 3 war games ti US iti Pilipinas, naisayangkat 8 Ka Basavaraju, banwar ti rebolusyon nga Indian 9 Operation Gideon's Chariot ti Israel iti Palestine 10
Ti Ang Bayan ket ipabpablaak ti Komite Sentral ti Partido Komunista ng Pilipinas dua a daras iti tunggal bulan	
 ang.bayan@cpp.ph	

Teoretikal a kumperensya kanaig iti kumprador ken burukrata kapitalismo

Nagtutipon idia Nairobi, Kenya idia Africa idi Mayo 23-24 ti 110 indibidwal a mangibagbagi iti 28 partido a proletaryo-sosyalista, pormasyon nga anti-imperyalista, organisasyon iti panagsukisok ken progresibo a tignay ti umili manipud iti 20 pagilyan iti lima a kontinente para iti maysa a teoretikal a kumperensya. Iti panangiyuna ti National Democratic Front of the Philippines (NDFP) ken ti Communist Party Marxist Kenya (CPMK), nagbalin a naballigi ti kumperensya a nangtalantan iti burukrata ken kumprador a kapitalismo kadagiti neokolonya.

Ti kumperensya a napauloan a Sangalubongan a Kumperensya a Teoretikal Kanaig iti Kumprador ken Burukrata Kapitalismo kadagiti Neokolonya, ti maikapad iti serye dagiti kumperensya nga insayangkat ti NDFP a mangtaltalantan iti napapateg nga usapin iti teorya. Daytoy ti umuna a kumperensya a naisayangkat idia Africa. Natalantan iti kumperensya ti 21 artikulo a sinurat dagiti komunista ken proletaryo-sosyalista a partido ken dagiti anti-imperyalista nga organisasyon a mangidadaulo iti tignay para iti wayawaya idia Congo, Cyprus, Guatemala, Indonesia, Iraq, Ireland, Kenya, Kurdistan, Nepal, Pakistan, Palestine, Pilipinas, Sudan, South Sudan, Turkey, Uganda ken Zambia.

Ti dua-aldaw a kumperensya ket nagserbi a gundaway para iti panangilanad ti Marxista-Leninista a panagamiris iti agraraira a moda ti produksyon iti nadumaduma a pagilyan. Partikular nga inamiris ditoy ti istorikal a panagdur-as dagiti neokolonyal a gimong iti sidong ti kontrol ti imperyalismo.

Inamiris dagiti delegado ti kumperensya ti materyal a ramut ti burukrata kapitalismo ken kapitalismo a kumprador, basar kadagiti sinurat da Lenin ken Mao kanaig iti malakolonyal ken malapyudal a panagari, kasta met kadagiti iskema ken addang ti imperyalismo a US tapno mapatalinaed ti kontrol kadagiti neokolonya.

Napagadalan met ti papel ti nadumaduma a dasig kadagiti neokolonya kas lokal nga ahente ti pananggamrud iti ekonomya ken panagbalin a paspasurot iti pulitika ken militar iti nagan ti interes ti imperyalismo. Naki-paset dagiti delegado iti nauneg a tinnalantan tapno mapaadalem ken makisinnukat ti panagamiris kadagiti kundisyon a nangiyanak kadagiti istruktura ti kagimongan a malakolonyal ken malapyudal kadagiti pagpagilyan da.

Natalantan met dagiti praktikal nga usapin nga addaan pakainaigan na iti rebolusyonaryo a trabaho ken panangiyabante kadagiti tignay ti umili, nangruna iti konteksto ti burukrata kapitalismo. Inamiris dagiti delegado dagiti estratehiya para iti panag-organisa kadagiti partikular a dasig ti kagimongan, kas ti malaproletaryado ken napagadalan nu kasano a panpandayan ti kumarkaro a sangalubongan a krisis ken umun-uneg nga imperyalista nga agresyon ti panagdur-as dagiti pwersa a rebolusyonaryo, ken ti nalawlaw a tignay Kannigid kadagiti pagilyan ken rehiyon da.

Ti artikulo a naibingay manipud iti Pilipinas ket sinurat ti Komite Sentral ti Communist Party of the Philippines. Sinublian ti artikulo ti pakasaritaan ti panagtaud ti kumprador ken burukrata kapitalis-



mo iti pagilyan a resulta ti panagari ti imperyalismo a US babaen ti ahente daytoy iti ekonomya ken pulitika. Naipalawag met ditoy ti papel ti kumprador ken burukrata kapitalista tapno pagtalinaeden ti malakolonyal ken malapyudal a gimong a Pilipino.

Iti panaggibus ti kumperensya, nagipeksa ti pannakikaykaysa dagiti delegado iti narambakan nga African Liberation Day idi Mayo 25 kas pananglagip iti pannakabuangay ti Organization of African Unity a nagbalin nga African Union. Nabuangay ti OAU tapno iyabante ti panagkaykaysa ken panagtitinu-long dagiti anti-kolonyal a tignay para iti wayawaya ken dagiti timmaud a baro nga independyente a gubyrno iti 30 pagilyan nga African idi dekada 1960.

Minarkaan da daytoy kas paset ti komun a dangadang dagiti maddanes nga umili laban iti imperyalismo ken amin a reaksiyon. Pina-singkedan ti kumperensya ti pannakikaykaysa dagiti pwersa nga anti-imperyalista ken proletaryo-sosyalista iti agtultuloy a kinapateg dagiti tignay para iti wayawaya iti Africa a paset ti nasaksaknap a dangadang para iti bukod-a-pangngeddeng ken sosyalismo. AB

Laban ti mangmangged, drayber ken nakurapay para iti pagbiagan ken pagnaedan

Iti sango ti kumarkaro a krisis iti ekonomya ken nasaknap a panangdadael iti pagbiagan ti masa nga anakling-et, agtultuloy a tumaktakder dagiti mangmangged ken nakurapay iti syudad. Lumablabaen da babaen ti panangisayangkat kadagiti piket, welga, sardeng-pasada ken barikada ti umili.

Welga iti Kawasaki. Nagwelga ti 140 mangmangged ti Kawasaki Motors Phils. Corporation (KMPC) iti panangiyuna ti Kawasaki United Labor Union idi Mayo 21 gapu iti saan a panaggunay ti negosasyon iti *collective bargaining agreement* (CBA) iti baet ti administrasyon ken unyon. Nakatakder ti piketlayn ti unyon iti sango ti hedkwarters ti kumpanya idiay Muntinlupa City. Imawag da ti makabiag a sweldo, nainkalinteg a benepisyo ken panangbigbig iti karbengan dagiti mangmangged.

Laban dagiti drayber idiay Luceña City. Dandani dua a bulanen a nakawelga dagiti drayber ken mangmangged ti FOC Transportation Corporation iti terminal daytoy idiay Barangay Comon, Infanta, Quezon. Dagiti bus ket agbibyahe iti ruta nga Infanta-Lucena City. Inputok dagiti drayber ken mangmangged ti welga gapu iti panangipaidam kadakuada iti nainkalinteg a *separation pay* ken saan a panagsango ti kumpanya iti negosasyon. Imbes a sungbatan dagiti arungaing da, pinilaan ti kumpanya ti kaso a *grave coercion* ken *illegal strike* dagiti mangmangged ti kumpanya ken organisador ti pederasyon ti unyon.

₱1,200 makabiag a sweldo. Nagpiket dagiti mangmangged manipud iti National Capital Region (NCR) iti panangiyuna ti Unity for Wage Increase Now iti Regional Tripartite Wages and Productivity Board-NCR kagiddan ti panangipila ti petisyon para iti ₱1,200 makabiag a sweldo idi Mayo 22. Inrana da ti

tignay ken panagisumite iti inyawag a konsultasyon iti sweldo ti RTWPB NCR.

Idi Hunyo 2, nagpiket dagiti mangmangged iti sango ti Kongreso tapno irupir ti panagipasa ti gakat a ₱200 para iti amin a mangmangged iti nailyan a saklaw. Dua nga aldaw kalpasan daytoy, inpasa ti Kongreso ti nasao a gakat iti maikatlo a panagdenggeg. Kunada, numan pay nakaad-adayo latta ti nayon a ₱200 iti ₱1,200 a makabiag a sweldo, rumbeng a dagus nga aprubaran ken pirmaan ni Ferdinand Marcos Jr daytoy.

NCAP ken jeepney phaseout, ibasura. Idi Hunyo 2, nagkaraban ti Stop NCAP Coalition kadagiti mayor a dalan iti Metro Manila ken nagtitipon da iti sango ti upisina ti MMDA idiay EDSA-Ortigas tapno ipabasura ti No-Contact Apprehension Policy (NCAP). Segun iti koalision, ti NCAP ket ilegal, kontra-marigrigat ken saan a dimmalan iti usto a proseso. Umuna, kinwestyon dagiti eksperto iti linteg ken grupo iti karbenganta ti patakaran, nangruna kanaig iti basaran a pang-konstitusyon ken dagiti proseso daytoy.



Nagsardeng-pasada ken nagprotesta dagiti tsuper ken opereytor ti dyip idiay Panay ken Negros tapno ipabasura ti Public Transportation Modernization Program (PTMP) ken Local Public Transport Route Plan (LPTRP) idi Hunyo 5 ken Mayo 30. Paset daytoy ti lawas ti protesta nga insayangkat ti Piston manipud Hunyo 2 agingga Hunyo 6.

Barikada idiay Mayhaligue, Tondo. Pinaay ti panagkaykaysa ken barikada dagiti residente ti Mayhaligue Street iti Barangay 262 ken 264 iti Zone 24, Tondo, Manila ti demolisyon nga insayangkat dagiti pwersa ti estado idi Mayo 26. Uppat ti ilegal nga inaresto dagiti pulis iti kumprontasyon. Nasurok 400 a pamilya wenno dandani 2,000 indibidwal ti maawan ti pagtaengan iti plano a demolisyon ken panangtagtagikua ti kumpanya a 2288 Ethan Realty Corporation. Temporaryo nga inpasardeng ti maysa a korte iti Manila ti demolisyon kasaruno ti panangkanunong iti petisyon para iti temporary restraining order (TRO) idi Mayo 27.

Demolisyon idiay Davao City. Saan a bumaba iti 400 pamilya ti napatalaw iti inyaramid a demolisyon ti 500-katao a pwersa a pakabilangan ti 300 pulis, iti Upper Arroyo, Barangay Matina Crossing, Davao City idi Mayo 23. Dimmanon iti 80 balay ti narebba iti demolisyon nu sadinno nga apektado ti 60 natataengan ken saan a bumaba iti 200 ubbing. Maysa a mandar ti korte ti naaramat tapno ipatungpal ti demolisyon ngem para laeng daytoy iti pito a balay iti nasao a distrito. Temporaryo a nainpasardeng ti demolisyon iti bileg ti TRO a naala dagiti residente idi Mayo 24. **AB**

Panagriribuk ti militar kadagiti komunidad, makapatay kadagiti sibilyan

Dua a sibilyan iti Negros ti naiyulat a natay gapu iti panagriribuk ti militar kadagiti komunidad da idi Mayo. Kabayatan na, tuloy-tuloy ti panagabuso dagiti soldado idia Albay, Masbate, Bohol ken Metro Manila.

Idiay Negros Occidental, naiyulat a natay ti maysa a babai a ni Lolita Reman iti Sityo Toril, Barangay Bandila, Toboso idi Mayo 20, gapu iti nalabes a buteng ken troma kadagiti operasyon ti 79th IB iti lugar. Rinaut ken rinansak dagiti soldado ti 79th IB ti balay ti pamilya Mahusay nga ayan ni Reman.

Kastoy met laeng ti napasamak idia Barangay Minapasok, Calatrava. Inatake ti *stroke* ti mannalon a ni Boyet de Asis idi Mayo 23 gapu iti panagpangpangta kenkuana ti pito a soldado ti 79th IB ken dagiti traydor a da Marlon Basalo (Elan) ken alyas Jonel/Mike iti Sityo Kapanuya.

Idi Mayo 31, pwersado a sinerrek ken rinansak dagiti soldado ti 79th IB ti balay ti agassawa nga Alejandro ken Maricel Villamero iti Sityo Manaysay, Barangay Cambayobo, Calatrava. Tinakaw dagiti soldado ti nasurok ₱7,000 a nabayag nga inurnong a kwarta ti agassawa.

Idiay Masbate, inpasidong iti naulpit nga interrogasyon dagiti soldado ti 96th MICO ti 12 sibilyan manipud iti Uson, Masbate idi maudi a lawas ti Mayo. Pilit a papaaminen dagiti soldado dagiti nasao a sibilyan nga adda ti silpo da iti NPA. Kimmaro ti sakit ti maysa kadagiti biktima kalpasan ti interrogasyon ken narigatan daytoy nga agsao kalpasan a maatake iti sakit iti puso ken *diabetes* gapu iti buteng ken troma.

Idiay Negros Oriental, sinarungkan dagiti soldado ti balay ti mannalon a ni Alan Garde iti Barangay Sandayao, Guihulngan City idi Mayo 15. Pilit a papaaminen dagiti soldado ni Garde nga addaan silpo ken sumupsuporta isuna iti NPA. Iti didiay met laeng nga aldaw, sinerrek ken rinansak dagiti soldado ti balay ni Rocky Fat. Pinaruar dagiti soldado nga adda nakumpiskar nga armas manipud kenkuana ken ginandat da a tiliwen ngem timmakder ti pamilya na kontra ditoy.

Manipud Mayo 3, inpasidong ti 83rd IB iti arig na *martial law* a panagari iti tallo a barangay iti Caramoan, Camari-

nes Sur. Hinaras, pinangtaan ken pinabasol dagiti militar dagiti residente ti komunidad, partikular ti innem nga indibidwal, a kakabagyan wenno tagasuporta kano ti NPA. Ti sumagmamano kadagiti biktima ket pilpiliten ti militar nga iruar ken "isuko" dagiti assawa da a mapababasol a Nalabbaga a mannakigubat. Mano a daras met a pwersado a sinerrek dagiti soldado ti balbalay ken illegal nga alalaan da ti litrato dagiti residente.

Idiay Northern Samar, inpasidong iti hamlet ti AFP dagiti barangay iti Catubig, Las Navas, Gamay, Mapanas ken Palapag manipud idi Hunyo 4. Inpataw daytoy ti militar kasaruno ti kunkunada nga engkwentro ti AFP iti NPA iti didiay nga aldaw iti Barangay Nagoocan, Catubig. Maparparitan a rumwar ti baryo dagiti residente uray pay iti bukod da a talon, kaabay a baryo wenno iti ili da laeng a mapan. Sakbay daytoy, nasaknap ti panangpwersa ti militar kadagiti residente iti ili ti Palapag a "pasukuen" dagiti kapamilya da a mapababasol a mannakigubat ti NPA.

Panag-aresto ken panagipila ti pinarbo a kaso. Naaresto iti kaso nga *illegal possession of firearms and explosives* ken napabasol a kameng ti NPA ni "Ruben", 47, mangmangged iti konstruksyon ken residente ti Barangay Naman-tao, Daraga, Albay. Dinukot isuna dagiti elemento ti 31st IB iti balay na idi Mayo 23 ken inpanda iti maysa a bakante a balay. Nagpapatok ti paltog dagiti soldado tapno paruaren nga adda ti engkwentro.

Idiay Bohol, nagiwaras ti peke a damag ken impormasyon ti CIDG idi Mayo 23 laban ken Carmilo Tabada, konsehal iti maysa a barangay iti ili ti Trinidad. Pinabasol da nga upisyal iti pinansya ti CPP ken kunkunada nga inaresto da isuna gapu iti kaso a "terrorism financing." Inlawag ni Tabada nga isuna mismo ti immasideg iti korte ken nagpyansa kanai giti kaso.

OP-OD, inyaramid dagiti rebolusyonaryo a grupo

MANO NGA ALDAW sakbay ken kalpasan ti reaksyunaryo nga eleksyon idi Mayo 12, nagiyaramid ti operasyon pinta-operasyon dikit (OP-OD) ti nadumaduma nga organisasyon nga alyado ti National Democratic Front (NDF) tapno ibunannag ti kinabulok daytoy. Kangrunaan a mensahe kadagiti OP-OD ti panangipalatak a rebolusyon ti pudno a solusyon a mangipaay ti pudno a panggimong a panagbalbaliw iti pagilyan, saan a ti reaksyunaryo nga eleksyon.

Nakaparparang ti elektroniko a panagsaur ken dadduma pay a tipo ti anomalya tapno pumabor kadagiti mangibagi kadagiti apo't daga, burges kumprador ken ti imperyalista a US. Ad-adda nga ibunannag ti kalkalpas nga eleksyon ti kinabangkarote ken kina-ubbaw ti nasao a "demokratiko a proseso."

Nagpanawagan da iti umili nga agturong iti kaaw-awayan, agkameng iti New People's Army ken iyabante ti gubat ti umili.

Dagiti aktibidad ket insayangkat ti Kabataang Makabayan, Artista at Manunulat ng Sambayanan, Liga ng Agham para sa Bayan, Katipunan ng mga Samahang Manggagawa ken pangrehiyon a balangay ti NDF. Inyaramid da daytoy iti Polytechnic University of the Philippines-Sta. Mesa, University of the Philippines (UP)-Los Baños, UP Manila, kadagiti kalsada ti Manila, Baguio City, Rizal ken Quezon.

Panagsagaba dagiti Pilipino iti panagkamat ti rehimen Trump kadagiti imigrante

MANIPUD IDI BALBALIW nga agtugaw ni Donald Trump bilang presidente ti US daytoy Enero, awansarday ti nasaknap a panag-atake, panagkamat, inkapilitan ken arbitrario a panangpatalaw wenno deportasyon kadagiti mangmangged nga imigrante idia US. Manipud Enero agingga Mayo ket dimmanonen ti nasurok 271,000 nga imigrante ti inpadeport ti administrasyon bayat a saan a bumaba ti 49,184 nga imigrante ti madama a nakadetine iti nadumaduma a pasilidad ti Immigration and Customs Enforcement (ICE) iti US.

Segun iti embahada ti Pilipinas ken basar kadagiti kaso nga iggem ti Tanggol Migrante, mapatta-patta a saan a bumaba iti 30 Pilipino nga imigrante ti naiyulat a naipadeport tatta a tawen. Saan a maala ti eksakto a bilang dagiti nakadetine wenno indeport ti ICE gapu ta awan ti ipabpablaak daytoy nga impormasyon.

Adda iti 150,000-370,000 ti Pilipino nga awanan dokumento wenno iligal nga agin-indeg idia US.

Segun iti Bayan USA, saan nga umanay ti ar-aramiden nga aksyon ti embahada ti Pilipinas iti US ken dagiti konsulado daytoy para kadagiti Pilipino nga imigrante a nakakulong ken nakaituding a mapaawid. Nalabes ti panagbaybay-a ken kinaawan-pakibiang da kadagiti Pilipino nga imigrante nga agsapsapul ti tulong. Uray ti ayuda nga Assistance to the Nationals Fund ti embahada ket naipaidam kadagiti agkasapulan.

Iti sango ti panagbaybay-a ti rehimen US-Marcos, agtultuloy ti panagkampanya ken panag-organisa dagiti organisasyon iti US iti panangiyuna ti Tanggol Migrante, dagiti alyado nga organisasyon ken dagiti Pilipino iti komunidad. Nagisayangkat da ti nadumaduma nga aktibidad kas ti *press conference*, rali, panagbisita kadagiti nakabalud, panangipatulod ti surat kadagiti korte ken panagkalap ti donasyon para iti madagdagus a pannakaruk-at dagiti naibalud ken panangtulong kadagiti pamilya da.

Gapu iti sangsangkamaysa a tignay dagiti umili iti US, naaramid da a mapawayawayaan ni Michelle (saan a pudno a nagan na) idi Abril 30 ken ni Lewelyn Dixon idi Mayo 29, agpada a naidetine iti NorthWest ICE Detention Center (NWDC) idia Tacoma, Washington.

Madama pay laeng a nakadetine da Maximo Londerio, Rodante Rivera, Ligaya Jensen ken Alma Bowman, agpapada a residente a manon a dekada iti US.

Immawag met dagiti demokratiko nga organisasyon iti US para iti madagdagus nga aksyon manipud iti gubyerno ti Pilipinas. Kunada, nasken daytoy nga ikkan ti naan-anay a suporta ti amin nga imigrante, karaman dagiti sumangsango iti deportasyon, trafficking wenno panagtakaw ti sweldo. Immawag da met ken Ambassador Jose Manuel Romualdez a bumaba laengen iti pwesto nu saan na a kabaalan nga ipatungpal ti trabaho na a salakniban dagiti Pilipino idia US.



Usigen ni Sara Duterte. Nagprotesta iti Senado idia Pasay City dagiti progresibo a grupo idi Hunyo 3 tapno umawag a rugyanen ti naigagara a naitantan a panangusig iti kaso ti *impeachment* ni Vice President Sara Duterte. Binatikos da ti panangitantan babaen ti adu a palusot ti Senado tapno rugyan daytoy. Idi pay Pebrero a naisumite ti House of Representatives dagiti artikulo ti *impeachment*.

Agsusumbangir metten ti panagbatikos iti Senado gapu iti panaglabsing daytoy uray iti Konstitusyon 1987 gapu iti panangitantan iti panagusig. Kabilang ditoy dagiti propesor ti University of the Philippines College of Law. Kabayatanna, naituding a mangisayangkat ti nasaknap a protesta inton Hunyo 11, aldaw ti panagdengngeg ti Senado iti *impeachment*, ti nadumaduma a grupo iti panangiyuna ti Taumbayan Ayaw sa Magnanakaw at Abusado Network Alliance (TAMA NA).

Laban mangngalap. Nagisayangkat ti *fluvial parade* wenno parada dagiti bangka ti Pamalakaya ken Save Laguna Lake Movement idia Muntinlupa City idi Mayo 31, nailyan nga aldaw dagiti mangngalap, tapno ipanawagan ti panangibasura iti managdadael a Laguna Lake Roadshore Network Project ken 2,000-ektarya a *floating solar power project* idia Laguna de Bay.

Idi Mayo 30, sangsangkamaysa a nagmartsa ti mano gasut a mangngalap, dagiti tagasuporta ken salaknib ti lawang agturong iti Mendiola idia Maynila. Immawag da ti panangsalaknib iti karbengan dagiti mangngalap, panangsupyat iti reklamasyon ken panangbawi iti desisyon ti Korte Suprema kanaig iti 15-kilometro a *municipal waters*.

Hustisya para ken Junver. Nagitugkel ti kandila dagiti estudyante ti University of Santo Tomas iti kampus daytoy idia Manila idi Mayo 29 kas panawagan ti hustisya iti pannakatay ni Junver Toledo, 22, kapada da nga estudyante. Naiyulat ti panagpakamatay ni Toledo, maysa nga estudyante iti UST College of Rehabilitation Sciences idi Mayo 17 gapu iti presyur iti panagadal.

Ruk-atan dagiti balud-pulitikal. Nagisayangkat ti piket-protesta ti Karapatan-National Capital Region iti sango ti Quezon City Hall of Justice idi Mayo 20. Panawagan da a dagus a wayawayaan ken ibasura dagiti kaso nga *illegal possession of firearms and explosives* laban kadagiti unyonista a da Mark Ryan Cruz, Romina Astudillo ken Jaymie Gregorio, a paset ti Human Rights Day 7. Naituding ti panagdengngeg iti didia nga aldaw ngem saan a natuloy ken balbaliw a naiskedyul inton Agosto gapu ta saan a nakasangpet ti ukom gapu kano ta "nakabakasyon."

71 iti 82

prubinsya ket kontrolado dagiti **dinastiya iti pulitika** kalpasan ti 2025 eleksyon, kas met laeng sakbay ti eleksyon.

3 kalihim

laeng ti pinadisi ni Marcos Jr iti gabinete na kalpasan ti pammarang a panagparesayn na iti intero a gabinete tapno kano sungbatan ti pukkaw ti umili para iti panagbalbaliw.



sadiwa nga ikan ti napalubosan a maangkat iti rason a nakaserra ti 3 a bulan manipud Hunyo 1 ti *fishing season* idia **Davao Gulf**.



wenno agingga ₱600M/bulan ti maluglugi kadagiti negosyo iti **Tacloban City** bayat a nakaiyatnag dagiti restriksyon iti panagbyahe dagiti dadakkel a trak iti **San Juanico Bridge**.



911

ti kumpirmado a kaso ti MPox (**monkeypox**) iti Pilipinas manipud 2024 agingga Hunyo 4, 2025. Daytoy ket saan nga umak-akar iti angin kas ti Covid-19 nu di ket babaen ti panangidekkt ti bagi iti tao nga addaan sakit ditoy, wenno kadagiti alikamen a kontaminado.

57/aldaw

baro a kaso ti **HIV** iti Pilipinas idi Enero-Marso 2025, nangatngato ti 50% iti kapada a bulbulan idi 2024. **Kaadwan kadagiti kaso ket agtawen 15-25.**



1-10

iti kangatwan ti sweldo iti gubyrerno idi 2024 ket panay nga upisyal ti **Bangko Sentral ng Pilipinas**; kangatwan ti sweldo ti dadaulo daytoy a ni Eli Remolona a kumakaud ti ₱47.96M kada tawen.

70%

nangatngato ti bilang dagiti kaso ti **krimen** a nakairamanan dagiti **soldado nga Amerikano** idia **South Korea** idi 2023 kumpara idi.

Nagtaudan: 2024 Justice Yearbook, Ministry of Justice, South Korea



Pribatisasyon ti CBK Hydroelectric Plant, kinundenar

Nainget a binabalaw ni Atty. Carlos Zarate, dati a mangibagi ti Bayan Muna, ti plano ti rehimen US-Marcos nga isapribado ti Caliraya-Botocan-Kalayaan (CBK) *complex*. Kunana, mangitunda laeng daytoy ti ad-adda a pananggina ti singir ti kuryente a nayon a padagsen iti umili a nakasanggir iti serbisyo.

"Ti gubyrno ti rumbeng nga agkontrol kadagiti kangrunaan a serbisyo kas ti kuryente. Imbes nga ilako ti CBK, nasken nga aramiden daytoy a modelo ti *renewable energy* a mangpababa ti singir ti kuryente para iti amin," nayon ni Zarate.

Naituding ti pribatisasyon ti CBK *complex* iti ngudo ti Hunyo tatta a tawen. Segun iti Department of Finance (DOF), mabalin a kumita ti gubyrno ti ₱50 bilyon (\$897.99 milyon) agingga ₱100 bilyon manipud iti panangisapribado iti pasilidad.

Ti 728 *megawatt* (MW) Caliraya-Botocan-Kalayaan *hydropower complex* ti kaykaysuna nga agandar a *hydroelectric facility* a sanikua ti Pilipinas. Daytoy met ti kadaanan a *hydropower plant* iti pagilyan.

Ti CBK *complex* ket bukuklen ti Botocan *hydro electric power plant* (HEPP) a naitakder idi 1939 nga addaan 20.8 MW a kapasidad, ti Caliraya HEPP a naitakder idi 1942 nga addaan kapasidad a 22 MW, ken ti Kalayaan *pump storage power plant* a naitakder idi 1983. Nakatakder dagiti planta kadagiti barangay iti Kalayaan, Lumban ken Majayjay idia Laguna.

Ti *complex* ket umuna a napadur-as iti sidong ti National Power Corporation (NAPOCOR). Idi Pebrero 7, 2001, upisyal nga inwards ti CBK Power Company Limited ti CBK *complex* iti sidong ti Built-Rehabilitate-Operate-Transfer *scheme* ti gubyrno ti Pilipinas babaen ti NAPOCOR nga agleppas kalpasan ti 25 taon.

Idi Abril 2005, naala manipud iti orihinal nga agtagikua ti CBK BROT Agreement ti dua a Japanese a kumpanya—ti Electric Power Development Co., Ltd (J-Power) ken Sumitomo Corporation. Malpas ti kontrata daytoy inton Pebrero 2026.

Ti CBK *complex* ket maysa iti tallo a nabatbati a dakkel a planta ti kuryente a tagikua ti gubyrno. Naipasidong dagitoy iti Power Sector Assets and Liabilities Management Corporation (PSALM) para iti pribatisasyon dagiti pasilidad. Ti dua pay a naituding a mailako metten ket ti 932MW Agus-Pulangui *hydropower complex* iti Mindanao *grid*; ken ti 210MW Mindanao *coal plant*. AB

3 war games, aggigiddan nga isaysayangkat ti US iti Pilipinas

AGDADATA A PANANGRABNGIS iti soberanya ti Pilipinas ti presensya ti rinibo a soldado nga Amerikano, Australian ken dadduma pay a gangannaet a tropa iti teritoryo ti pagilyan para iti managprobokar ken dakkel a *war games*. Manipud Mayo, tallo ditoy ti aggigiddan nga isaysayangkat ti US, maysa iti kabinnulig daytoy a hukbo ti Australia. Dagitoy ket ti Kamandag (Mayo 26-Hunyo 6), Kasangga (Mayo 19-Hunyo 24) ken Salaknib 2025 Phase 2 (Mayo 19-Hulyo 20).

Naisayangkat ti Kamandag idia Batanes; idia Capas, Tarlac nu sadinno a naiyaramid dagiti live-fire drills ken idia Burgos, Ilocos Norte nu sadinno a naisayangkat ti maysa a *maritime strike operation*. Adda met dagiti aktibidad idia Palawan ken dadduma pay a paset ti Luzon ken iti Tawi-tawi idia Mindanao.

Inaramat dagiti tropa ti US ken Pilipinas ti Navy-Marine Expeditionary Ship Interdiction System (NMESIS) ken High Mobility Artillery Rocket System wenno HIMARS iti Kamandag. Ti NMESIS ket maysa a sistema ti misayl nga *anti-ship* wenno pangpabet-tak ti barko. Makarkarga daytoy iti maysa nga *unmanned ground vehicle* (dakkel a trak) a maaw-awagan a ROGUE Fires Carrier ken addaan karga a Naval Strike Missile (NSM).

Karaman iti *war games* ti 2,031 soldado ti US Marine Corp ken 2,028 pwersa manipud iti Pilipinas. Adda met dagiti tauhan a militar manipud iti South Korea, Japan ken United Kingdom a makipaspaset iti *war games*. Agserserbi met a "para paliw" dagiti tauhan manipud France, Canada, Bahrain, Australia, Indonesia, Thailand ken Netherlands.

Ti Kasangga ket naluktan iti kampo ti 4th ID idia Cagayan de Oro City ken naisayangkat iti Camp Kibaritan, Kalilangan, Bukidnon.

Kabayatanna, ti Salaknib ti US ken Pilipinas ket madama a maisaysayangkat iti Northern Luzon.

Dagitoy a *war games* ket maisaysayangkat iti pagilyan tapno irutan ti US ti kontrol daytoy iti AFP, segun iti Communist Party of the Philippines (CPP).

"Supsupyaten ti umili a Pilipino dagitoy a *war games*. Malaksid iti ituntunda daytoy a peligro kadagiti Pilipino, didigra pay kadagiti residente a mapapaidaman ti pagbiagan tapno wayaan dagiti panagsanay," segun ken Marco Valbuena, pangulo nga upisyal iti impormasyon ti CPP.

Ti adu ken nasesedsed a *war games* ken ti panagpakpakaaso-aso ti AFP ken ti rehimen Marcos ti makagapu nu apay nga ibilbilang ti adu a pagilyan iti Asia ti Pilipinas kas *proxy* wenno mangibagi iti US, segun pay iti CPP. Saan a bulsek dagiti kabangibang a pagilyan iti Asia iti kina-paspasurot ni Marcos ken dagiti heneral daytoy iti direksyon ken plano ti US.

Kadwa Basavaraju, banwar ti rebolusyon nga Indian ken sangalubongan a proletaryo

Pinadayawan ti Communist Party of the Philippines ni Kadwa Basavaraju (Nambala Keshava Rao), kabuklan a kalihim ti Communist Party of India (Maoist), a namartir karaman ti 27 pay a kakadwa idi Mayo 21. Pinatay isuda dagiti pwersa ti estado ti India iti naawagan a Masaker iti Gundekote, iti Abhujmad iti distrito ti Narayanpur idia Chhattisgarh, India.

Rumimrimat tatta ti nagan ni Kadwa Basavaraju iti intar dagiti immortal a banwar ti epiko a gubat ti umili iti India ken dagiti rebolusyonaryo a dangadang para iti nailyan a wayawaya ken sosyalismo iti intero a lubong. Pinangiggeman na ti silaw ti armado a dangadang idia India ken nagserbi a lawag iti dana ti sangalubongan a rebolusyon a proletaryo, nangruna kadagiti napalabas a dekada dagiti pannakapaay ken panna-kaabak dagiti pwersa a sosyalista iti nadumaduma a paset ti lubong.

Siasino ni Kadwa Basavaraju?

Naipasngay ni Kadwa Basavaraju idi 1955 iti pamilya dagiti manalon iti komunidad ti Jiyannapetta iti distrito ti Srikakulam, Andhra Pradesh nga adda iti abagatan a daya ti India. Nagadal isuna ti elementarya ken hayskul iti distrito da ken nagturong iti syudad ti Warangal iti kaabay nga estado ti Telangana tapno agadal ti inhineriya iti kolehiyo.

Bayat nga adda iti kolehiyo, nariing isuna iti kasasaad ken dangadang ti umili nga Indian a makagapu ti pannakipaset na iti tignay estudyante. Idi dekada 1980, nagbalin a paset ken nagakem isuna ti kangrunaan a rebbengen iti CPI (Marxist-Leninist) People's War. Nagbalin a kameng isuna ti komite sentral ti partido idi 1992.


Idi 2004, kabilang isuna kadagiti nangiyuna iti panagtapon ti CPI (ML) People's War ken Maoist Communist Centre of India (MCCI) tapno buklen ti CPI (Maoist). Maysa isuna a nangbuangay iti hukbo ti umili ti India a People's Liberation Guerilla

Army (PLGA) idi 2000. Indauluan na daytoy iti nabayag a panawen ken nangiyuna iti adu a balligi iti panangbukel kadagiti rebolusyonaryo a base ken panangisayangkat kadagiti taktikal nga opensiba laban kadagiti pwersa a pasista.

Nagserbi isuna a kameng ti Komite Sentral iti unos ti 33 tawen ken ti Politburo iti unos ti 25 tawen. Indauluan na iti nabayag a panawen ti Sentral a Komisyon ti Militar ti CPI (Maoist). Idi maudi a paset ti 2018, binotosan isuna ti Komite Sentral bilang kabuklan a kalihim ti CPI (Maoist) ken nangsukat iti panangidaulo ni Kadwa Ganapathy.

Awag para iti hustisya

Hustisya ti nagkaykaysa a pukaw ti umili nga Indian ken dagiti internasyunal a partido ken organisasyon iti pampapatay ken Kadwa Basavaraju ken ti 27 pay a kakadwa.



Naimaldit iti Masaker iti Gundekote dagiti panaglabsing iti internasyunal a makatao a linteg ken dagiti paganurotan iti gubat.

Segun iti ulat ti Dandakaranya Special Zonal Committee ti CPI (Maoist), ti 27 a kakadwa a kameng ti CPI (Maoist) ken mannakigubat ti PLGA ket napatay iti panagkubkob ti rinibo a militar ken pulis ti reaksyunaryo nga estado iti kampo da. Inbunannag ti komite a kalpasan dagiti labanan ket sibibiag a nakemmeg ni Kadwa Basavaraju ken naigagara a pinapatay dagiti berdugo a tauhan ti rehimen Modi.

Ti brutal a Masaker iti Gundekote ket paset ti terorista a kampanya nga Operation Kagaar. Narugyan ti operasyon idi Enero 2024 nu sadinno a nagaramat ti rinibo nga armado a pwersa ti reaksyunaryo nga estado, nagitakder ti ginasut a detatsment militar ken nagipatungpal ti kampanya ti pampapatay ken terorismo laban kangrunaan kadagiti Adivasi, wenno katutubo ti India.

Iti agdama, idurduron ti nadumaduma a demokratiko nga organisasyon idia India ti imbestigasyon iti Masaker iti Gundekote. Kayat da a pagsungbaten ti rehimen Modi ken dagiti upisyal militar daytoy iti narungsot a krimen.

Kabayatanna, inpekta ti Komite Sentral ti CPP ti naan-anay a talek iti Komite Sentral ti CPI (Maoist) a dagus nga agpili daytoy ti maysa a mangidaulo a kas kalaing ni Kadwa Basavaraju tapno akemen ti ineggaman na a responsibilidad. Kuna ti mangidaulo a komite, kumpyansa daytoy iti panagtapon ti kaamuan dagiti natataengan a kadre ken ti regta ken sirib dagiti agkabanwag a kadre, marimbawan ti CPI (Maoist) ti amin a pannubok, agtuloy iti dana ti rebolusyonaryo nga armado a dangadang, ken aggun-od ti dakdakkal pay a balligi iti gubat ti umili iti India. AB

Operation Gideon's Chariots, pamatay nga atake ti Israel ken US iti minilyon a Palestino

Iti umuna nga oras ti nadara a kampanya nga Operation Gideon's Chariots ti US ken Israel, 144 Palestino ti dagus a napatay kadagiti bomba ken panag-atake ti tropa daytoy iti Gaza. Kadagiti sumaruno nga aldaw, agsasaruno nga inatake dagiti pwersa ti Israeli dagiti pagbakwitan ken nabatbati nga ospital ken pagadalan tapno abugen dagiti Palestino agturong kadagiti pagbaludan a naisagana para kadakuada. Ginasut kadagiti napatay ket ubbing.

Ti Operation Gideon's Chariot, a narugyan idi Mayo 18, ti pamatay nga atake ti Israel ken US iti 18-bulanen a henosidyo ken 77-tawen a brutal nga okupasyon daytoy kadagiti teritoryo ti Palestine. Panggep daytoy a direkta a sakupen ti intero a Gaza ken ibalud ti agarup 1.5 milyon a Palestino iti "sentro ti ebakwasyon" iti abagatan a paset ti enklabo.

Manipud Oktubre 2023, dumanonon iti 63,000 Palestino ti direkta a pinatay ken 118,300 ti nasugatan ti panagbomba ken panagraut ti Israel. Dandani kagudwa dagiti biktima ket ubbing ken babbai. Mapat-patta a ginasut a ribo pay ti natay gapu iti bisin, sakit ken kinakurang ti pasilidad medikal. Adu met ti nagabburan laengen kadagiti narba a pasdek ken balbalay, a saan a nakita wenno nakali gapu iti awan-sar-day a panagraut ti Israel.

Panagaramat iti taraon ken ayuda kas armas ken negosyo

Dumanonon iti tukad-didigra ti panagbisin idiy Gaza nangruna manipud Marso nu kaano nga absoluto nga inparit ti Israel ti panagserrek ti amin a klase ti ayuda. Idi Mayo, inted daytoy ti responsibilidad ti panangiwaras ti taraon iti Gaza Humanitarian Foundation (GHF), maysa a pribado a kumpanya, nga agkadwa nga itakder ti US ken Israel tapno "abaken" ti Hamas.

Nainget a binabalaw ti United Nations ti panagaramat ti Israel iti GHF, a kuna daytoy ket kaniwas iti maiparbeng a kina-nyutral ken kina-independyente ti ma-

katao nga aramid. Kinundenar ti UN ti adu a pagilyan ken internasyunal nga institusyon, ti panagaramat ti Israel ken US ti ayuda ken taraon kas armas laban kadagiti sibilyan.

Malaksid iti GHF, inserrek met ti Israel ti maysa a pribado a kumpanya nga Amerikano tapno umakto kas "pwersa a pangseguridad" kadagiti sentro ti distribusyon daytoy. Kabilang ditoy ti Safe Reach Solutions, UG Solutions ken S.R.S. Security Firm, nga amin ket tagikua dagiti dati a heneral ti US Army ken Central Intelligence Agency. Ti panagpili kadagitoy a kumpanya ket inaramid dagiti kangatuan nga upisyal ti Israel, kabinnadang ti US, a saan a maidaldalan kadagiti parlamento ken kongreso da.

Tuluy-tuloy a sangalubongan a protesta

Minilyon nga umili iti sangalubongan ti nagkaykaysa a nagprotesta laban iti baro a dalluyon ti henosidyo idiy Gaza. Panawagan da ti madagdagus ken permanente a panagsardeng ti putukan iti Gaza ken panagsardeng ti brutal a panag-atake ken panagbomba ti Zionista nga Israel. Naigid-

dan dagiti protesta iti pananglagip iti maika-77 anibersaryo ti Nakba wenno Ti Didigra, ti umuna a gundaway a naranggas a pinadsid dagiti Zionista dagiti Palestino manipud kadagiti daga da tapno itakder ti estado ti Israel.

Ginasut a tignay ti naiyaramid kadagiti syudad iti Middle East, Europe, Asia, Africa ken uray iti uneg ti US. Adu a kabataan estudyante iti US ti natured a nangisayangkat kadagiti protesta ken diskusyon kadagiti unibersidad iti tengnga ti nairteng a pananglipit kadakuada.

Iti Pilipinas, nakikaykaysa ti Moro-Christian Peoples Alliance (MCPA) iti sangalubongan a panawagan ti madagdagus ken permanente a panagsardeng ti putukan idiy Gaza.

Segun ken Amirah Lidasan, kabuklan a kalihim ti MCPA, "manipud idi naputed ti panagsardeng ti putukan, ti Zionista nga Israel ken ti numero uno daytoy a taga pondo ket awan ti inpakita da nga asi kadagiti kakabsat a Palestino."

Immawag isuna iti internasyunal a komunidad nga ituloy nga allukoyen dagiti lider da nga agaramid ti aksyon laban iti awan-ressat a panag-atake ti Israel. "Ti pannakawayawaya ti maysa ket pannakawayawaya ti amin, nangruna tatta iti sangto ti nakaro a panaglabsing iti karbengan-tao, saan tayo a rumbeng nga agsardeng agingga a saan a nakaruk-at ti Palestine," kunana.

Idi Mayo 23, nagiyaramid ti grupo ti porum ken martsa iti University of the Philippines-Diliman. Nagiddan daytoy iti maika-8 nga anibersaryo ti panangipataw ni Rodrigo Duterte ti linteg militar ti Mindanao ken pananggrebbek iti Marawi City, ti agmaymaysa a syudad nga Islam iti pagilyan, idi 2017. AB

